

# Uzgojem malina do novih stipendija i radne navike

*Osnovna ideja ovog projekta jeste da stipendisti rade na malinjaku i sami ostvare sredstva za stipendije. Međutim, stipendisti koje ovo Udruženje finansira iz godine u godinu i nisu tako zainteresovani da učestvuju u ovom projektu*

August 28, 2017  
861



Prepoznavši problem nezaposlenosti tokom i nakon studiranja, Udruženje „Obrazovanje gradi BiH“ je pokrenulo projekat „**Zapošljavanje mladih**“, koji će studentima-stipendistima, omogućiti dodatno iskustvo i edukaciju, kao i sticanje radnih navika.

Radi se o projektu uzgoja i prodaji malina na zemljištu kojeg je Udruženje dobilo besplatno od donatora, koji je ujedno i veliki prijatelj Udruženja. Sredstva od prodaje, biće namijenjena za stipendiranje korisničkih grupa kao i podmirenje troškova.

## **Slab odziv stipendista**

**–S ozirom na činjenicu da veliki broj mladih ljudi završi, studira ili tek počinje školovanje, a nema novca za školu, ni za džeparac mislimo da bismo im izgradnjom malinjaka pružili mogućnost da zarade. Zemljišni prostor kod Ilijaša smo dobili na 5 godina besplatno od našeg prijatelja, donatora –** rekao je Jovan Divjak, direktor

Udruženja „Obrazovanje gradi BiH“.



Osnovna ideja ovog projekta jeste da stipendisti rade na malinjaku i sami ostvare sredstva za stipendije. Međutim, stipendisti koje ovo Udruženje finansira iz godine u godinu i nisu tako zainteresovani da učestvuju u ovom projektu.

**–Ideja je prihvaćena i predložena od Udruženja sa zadovoljstvom, ali s prvim korakom se vidjelo da lako neće biti jer mnogi stipendisti, a ni njihovi roditelji se ne odazivaju da zarade dnevnicu. Očito je da mladi prihvataju onu priču da nema posla, mi tvrdimo da se ispod svake lopate nalazi dobar posao, dobra markica ali djeca to nisu naučila. Svi oni imaju mobilne telefone, ali nisu naučili da imaju žulj na ruci – objašnjava Jovan Divjak.**

### **Druženjem i zabavom protiv teškog rada**

Bez obzira na mali broj stipendista/volontera koji su se odazvali da podrže ovaj projekat, radovi na malinjaku napreduju svaki dan.

**–Nažalost, mali broj njih se odazvao. Meni lično, kao nekome ko prije nije imao prilike raditi bilo šta vezano za poljoprivredu je bilo jako značajno naučiti nove stvari. Uživala sam u svakom danu radeći. Iako je priprema za sadnju i sama sadnja jako zahtjevan fizički posao, dani su nam prolazili u druženju i zabavi, te sada imamo priliku da vidimo prve maline, koje su plod našeg rada. Rad na ovom**

**projektu se nastavlja i u narednom periodu, i bez obzira na nedostatak zainteresovanosti naših stipendista, mi ćemo ih i dalje pozivati da učestvuju, jer smatramo da je ovaj projekat dobra prilika za sve nas da usvojimo nova znanja i vještine, a to je ono što Udruženje i pokušava da pruži svojim korisnicima svih ovih godina** – rekla je Melina Dželović, jedna od volonterki.

Kako bi motivisali i obavezali svoje stipendiste Udruženje će u narednim ugovorima za stipendije uvesti i 30 sati dobrovoljnog rada kao jedan od uslova za dobijanje stipendije.

**–Pokušat ćemo sad kad budu podijele stipendija, kad se izvrši izbor da ih na neki način obavežemo. Čak smo i dogovorili da u ugovoru bude da u toku godine moraju imati i najmanje 30 sati dobrovoljnog rada, što do sad nismo radili** – rekao je Jovan Divjak.

Kako navodi direktor Udrženja, osnovna bit i funkcionisanje samog Udruženja jeste socijalna inkluzija. Udruženje „Obrazovanje gradi BiH“ pomaže djeci koja su u ratu izgubila jednog ili oba roditelja, talentovanoj, socijalno ugroženoj, invalidnoj i romskoj djeci.

**–Bitno da oni nama svake godine učestvuju na ljetovanju, jer je tad tih 8 dana na Boračkom jezeru inkluzija gdje su uključena djeca sa posebnim potrebama, bez roditelja, romska djeca i djeca sa socijalnim potrebama. Tu Romi pokazuju da su socijalizirani, da se ponašaju prirodno u toj sredini sa djecom različitih intelektualnih i fizičkih osobina i da se odlično uklapaju** – rekao je Jovan Divjak za naš portal.

(portl-udar.net)